

Polko Sokome Korete Qu Nakayáñoní

Tesalonaika Yendé Unipareko Ñuno Uró

Mande Kembé

Uni sokome ña nakayáñaró ñundo **Grik** mandewore nakayáñaró, ko eneño owí nekaró, “Pol,” yaró. Uni ñuko **asáñowí uni** Pol nanġe. (*1 Tesalonaika 1:1* weyo qembe.) Itaka iño-iño uni kumimbo ñande ye iñoyoteñgo, ko enendo kumima naru 50AD quño ñuno Akaia mirako Korin yendémo ñuno nakayáñoro riní Tesalonaika yendémo ñuno uró. (Asa “50AD” murí muko ñandiro, ko Yesu nimí pisiyaró, yate kumima naru 50 ñunde rotaró. Nore kumima naru 2,000 ñunde rotoro yate itaka yoteto.)

Polko naru kapusa ñunoko Siria mira koro yendé ka, owé Antiok Siria, ñu rotoro mira enesówore khete uyaro **miti mande** yesowoyaró. Asa ko naru irisayómo ñuno, 48AD quño ñuno peka, enendo Esia mirawore kho tero uyareyate Mediterenian windi takaro Masedonia mirawore uyaro Tesalonaika ñuno kho tero **miti mande** yesowo yimitoyaró. (*Asá yerewí Uni 17:1* weyo qembe.) Ñunde tero Masedonia unipare qambu qundo iñondutu tañgurí, quko Juda uni kumimbo sañgirí tero kiro mande parámi tañgurí. Yiġo, Pol suwono mondó ta rotoro toñjeró. (*Asá yerewí Uni 17:10* weyo qembe.) Toñjero Beria yendémo ñuno uyarero kho tero eneño kho kopo Timoti ñuno rotoro, yate mira tapésina, Akaia mirako Atens yendémo ñuno uyareró. Imemonggo Polko Atens rotoro toñjero khe tukuni nanġe howero Korin yendémo ñuno yoní Timotiko eneno mahero Tesalonaika uniparetoro piña mande ka mironí sokome ña nakayáñaró, peka. (*Asá yerewí Uni 18:5* weyo qembe.)

Tesalonaika yendé ñuko yendé parámi ka, Masedonia mira koro yendé korete qu. Windi tapémo yotoro khe parámi ka **Rom** noñgo yendé kewerowore Esia mira uyaró. Komo suki Grik unindo towañgurí, quko imemonggo **Rom** unindo mahero rañgurí. Pol koro naruko ñuno Juda unipare qambu ñuya ñuno yorañgurí.

1 ¹Nore Pol, Sailas, Timoti, norendo sokome ña nakayáñatowó. Ñunde tero ye Anutu koro huru-huru qu^a tero Tesalonaika yendémo yoteygo, Anutu Awandoya Uni Parámi Yesu Kristo koya womoyoteygo qu, yeno uyarete. Anutuko samaka-samaka tuwó yunoní newonde ime yorowanjo.

Polko Tesalonaika uniparetoro ñondutuye ñuro Anutu yunñunajaro

²Naru rokóño norendo yeño ñjoro Anutu yunñunajoyoteto. Ñunde tero hariri teyoteto quno ñuno owéye nekoyoteto. ³Yeño ñondutuyembo okoko yiriní o meté qu teyoteygo, ko unipare newonde meté yunoro koweyumu eneygo teyoteygo, ko Uni Paráminani Yesu Kristo^b soporo quhurí korowoyoteygo. Naru rokóño norendo ñuro ñjoro Anutu Awa yunñunajoyoteto.

⁴Uni topo, ñande ñjoyoteto, ko Anutuko yeño hamó ñjo yunoro rokó yereró. ⁵Dokoro noreño miti mandenani^c ñu kina mande qembe ye keweroyemo kama tunoqaró. Kini, mande ñu mande kondé qembe tunoqiní Yuqa Surumímbo riní kondériní mande ñu hamó ñjanñurí. Yendo ñande ñjoyoteygo, nore ye keweroyemo yotoro samaka yerewero otete meté mu nanje howatowó.

⁶Mande ñu ñjiqo, quhurí parámi yeno tunoqaró. Quko noreño otetenani howero Uni Parámimboro oteteyó howi Yuqa Surumímbo wimbu yunoní ñiñgu-ñiñgu tero quhurí ñu korowoyoteygo. ⁷Ñunde korowoyi ñondutu unipare Masedonia mirako, ko Akaia mirako^d yoteygo qundo otete ñu qenero howeyoteygo. ⁸Yendo Uni Parámimboro mandí yero yesowoyoteygo ñuko giramu piño niriyo ñunde qembe. Niriyo ñu Masedonia mira koya Akaia mira ñuno nanje kama usayeyote. Kini, mira soso ñunoko yeño ñondutu Anutuware teyoteygo ñuro unipareto ñjoyoteygo. Ñunde ñuroko nore o ñuro yesowowero kho moré kini.

⁹Dokoro eneyombo ñande yesowoyoteygo, asa norendo yeno mahetowó quno ñuno yendo topo te nunañurí. Ñunde te nunoro anutu kota-kota rotoro rohoréñoro Anutu hamó mu suki-suki yorote quro sunará simóño tunoqañurí. ¹⁰Ko eneygo Nañuní sambo rotoro pitu umbuweya ñuro sopoyoteygo. Nañuní ñu khumoníqo, Anutuko okokowoní otoqaró. Nañuní ñuko Yesu, enendo Anutu koro saññirí parámi nokono maheweya ñu noñgo nore noriní meté yowato.

^a 1:1 “Anutu koro huru-huru” ñuko unipareto Yesu ñondutuworo huruwoyoteygo qu.

^b 1:3 “Yesu Kristo” - komo suki *ye-ye unindo* Anutuko uni ka rokóñoní mahero wiri yerete uni parámi horé tunoqeweya qu karo yanñurí. Juda unipareto uni maheweya ñu, “Kristo,” ma, “*Mesaiya*,” ye nekañurí. Asa Yesu mahiní eneygo unipareyo, “Kristo Yesu,” ma, “Yesu Kristo,” nanje ye nekañurí. ^c 1:5 “*miti mande*” ñuko Anutuko *Kristo* asáñoní khumoro quhurínanimboro kimo tiní Anutu koya newonde kanata tewero ñuro mande meté mu nanje.

^d 1:7 Masedonia mira ñuko Akaia mira tañgímo yora, ko mira ñuro yendé parámi kembé muko Tesalonaika yendé. Mira irisa-irisa ñuko *Grik* unindoro miraye.

Polko Tesalonaika yendémo ηuno khoyó taró

2 ¹Uni topo, ye ηande ijotenggo, nore keweroyemo yotoro kho teyatowó ηuko kina kama tunoqaró. ²Kini, ηande ijotenggo, komo Filipai yendémo unipareto o pi-piyimi te nunoro mande piyimi ranjagurí. Quko Anutunanimbo newondenani samakanjoro wimbu nunoní sanggiri unindoro kama soratowó. Kini, ye keweroyemo ηuya quhurí koroworo kondé kanjero, yate-yate Anutu koro miti mande^e ηu ye yimitoyato. ³Dokoro mande yeyoteto ηuko kota mande kini, ko newonde piyimi kama howeyoteto, ko kaná yerewero kama yeyoteto. ⁴Kini, Anutuko noreño metéjoro mandí wisiyowero quro kho nunoní miti mande ηu yeyoteto. Quko unindo khonanimboro metéjowaηgo ηuro kho ηu kama teyoteto. Kini, Anutuko newondenani qene rondañaró, asa ko enendo khonanimboro metéjoweya ηuro teyoteto. ⁵Dokoro mande enesó-enesó yero ye kama kaná yeretowó, ηu ye ijomukotenggo. Ko Anutuko meté tunomo ηande yesowoweya, ko norendo mone rewero quro mande ηu kama yimiratowó. Kini. ⁶Ko yembe ma uni meyowombe seré te nunowero quro mande ηu kama yimiratowó.

⁷Hamó, nore Kristo^f koro asá yerewí uniyó tero quhurí ye yunowero owénani moré peka. Quko keweroyemo mondó ta yoratowó, pareto simó susu yunoyotenggo ηunde qembe yoratowó. ⁸Norendo yeño kondé ijoro Anutu koro miti mande ηu rero ye yunatowó. Iju nanje kini, noreño yoto-yotonani soso ηuya rero ye yunato noreño topo-toponani hamó horé tunoqanjurí. ⁹Dokoro, uni topo, ye ijotenggo, koweyumu parámi horé teyatowó. Hamó, Anutu koro miti mande yesowoyatowó. Quko ηuya nore kosa suwo rokójoro mone kho meyowo tatowó. Ye wutu nerero quhurí ka korowowaηgo koro.

¹⁰Ye ηuya Anutu ηuya noreño otetenani meté tunomo yesowowaηgo. Ye ijondutu unipare keweroyemo yoratowó quno ηuno Anutu koro otete nanje, otete ronenejowí^g nanje, otete Anutu koro toñímo sara qu nanje howatowó. ¹¹Ye ijotenggo, norendo awa kato simómboro teyote ηunde nanje o meté te yunoro ¹²rukiso yerero newondeye samakanjatowó. Mande tunomo yato Anutu enejombo neko yirini enejo unipareyó wiri yereyote naruyómo^h ari owé parámi yunaró. Ijunde nanje ye enejo murí howero khe uyare mahe tewaηgo.

¹³Ijunde ηuroko naru rokójoro Anutu yunjunaηoyoteto. Dokoro yendo enejo mandí ηu manjonani moηgo ranjagurí quno ηande kama ranjagurí,

^e 2:2 “*miti mande*” ηuko Anutuko *Kristo* asáñoní khumoro quhurínanimboro kimo tiní Anutu koya newonde kanata tewero ηuro mande meté mu nanje. ^f 2:7 “*Kristo*” ηuko Yesu nanje, asa Anutuko rokóñoní mahero wiri yerete uni parámi horé tunoqaró ηu.

^g 2:10 “*otete ronenejowí*” ηuko Anutuko nore rokó yirini noreño murínanani enejo murí howeyote. ^h 2:12 “*Anutuko unipareyó wiri yereyote naruyómo*” ηuno ijondutu unipareko hamó Anutu kusunjoyómo yowaηgo.

ɲuko unindoro mande qu nanɟe. Kini, Anutu koro mande hamó mu reyangurí. Mande ɲundo nanɟe ye quroko kho tiní Yesuwore iɟondutu teyotengó. ¹⁴Dokoro, uni topo, yeko Anutu koro unipareto Judia mirako yotoro Kristo Yesuⁱ koya womoyangurí ɲunde qembe. Dokoro eneɟo sitú topo-topoyembo quhurí parámi te yunoyotengó. ɲunde nanɟe yeɟo sitú topo-topoyembo quhurí parámi ye te yunoyotengó. ¹⁵Juda uni ɲundo Uni Parámi Yesu uroyi khumaró, ye-ye uni^j yuroyi khumanɟurí, ko nore ɲuya yohowanɟurí. Anutuko eneɟo oteteye ɲuro piyimiɟote, ko uni ɲundo unipare soso koya sanɟirí te yunoyotengó. ¹⁶ɲunde tero enendo nore uni wini meyowo^k miti mande yimirato rambaruru takawanɟo ɲuro yero soré nerenɟurí. ɲunde tero eneɟo quhuríye soso ri manɟorete. Anutu koro newonde sanɟirí riní mahero eneya yorote.

Polko Tesalonaika unipare yiyowero quro kondé iɟaró

¹⁷Asa uni topo, naru tukuni quroko ɲuno kowenani sewemo yoteto, quko newondenani yeno yorote. Asa ko newonde surumí parámi tero yeɟo umu-kembaye qenewero quro oreýó seqaro kho kondé teyoteto. ¹⁸Hamó, nore yeno mahewero iɟoyoteto, no Pol, nondo naru kumimo yeno mahewero quro kho kondé teyanowó. Quko Monimbuko kusi nereyara. ¹⁹Qeni, Uni Paráminani Yesu pitu ko ɲano yoweya quno ɲuno do kato nore noriní o meté ɲuro sopro niɲgu-niɲgu tero kimo meté mu rero eneɟo toɲímo kaɟewato? Murí ɲuko ye nanɟe. ²⁰Iyo, yeɟomboro nore owé parámi reyoteto, ko yeɟomboro niɲgu-niɲgu teyoteto.

3 ¹Norendo yeɟo piɲa mandeye ka iɟowero quro kondé iɟoro, yate-yate noremata Atens^l yendémo nanɟe yotoro ²Timoti asáɲaro yeno uyaró. Timoti noreɟo toponari, enendo Anutu koya kho kopo tero Kristo ɲuro miti mande^m yero wisiyote. Wimbu ye yunoro iɟondutuye riní kondérewero quro asáɲaro yeno uyaró. ³Kowe surumí piyimi noreno tunoqaró ɲaro ye iɟondata parámi tewanɟo koro. Dokoro yeɟombo ɲande iɟotengó, ko Anutuko o kowe surumí ɲunde qu korowowero quro nore rokó nereró. ⁴Nore yeya yotoro ɲande yimitoyatowó, o quhurí enesó ɲuko noreno tunoqeweya. Ye hamó ɲande iɲi qembe, naru piyimi ɲu hamó tunoqaró. ⁵ɲu murí ɲuro nanɟe no yeɟo piɲa mandeye iɟowero

ⁱ **2:14** “Kristo Yesu” - komo suki *ye-ye unindo* Anutuko uni ka rokóɲoní mahero wiri yerete uni parámi horé tunoqeweya qu karo yanɟurí. Juda unipareto uni maheweya ɲu, “Kristo,” ma, “*Mesaiya*,” ye nekangurí. Asa Yesu mahiní eneɟo unipareyó, “Kristo Yesu,” ma, “Yesu Kristo,” nanɟe ye nekangurí. ^j **2:15** “*ye-ye uni*” ɲuko Anutuko mandí yunoní unipare yanɟurí. ^k **2:16** “*uni wini meyowo*” ɲunde quko Juda unipare kini qu nanɟe. ^l **3:1** “Atens” yendé parámi ɲuko Akaia mira koro yendé ka. Akaia mira koya Masedonia mira taɲgímo yora, ko mira irisa-irisa ɲuko *Grik* unindoro miraye. ^m **3:2** “*miti mande*” ɲuko Anutuko *Kristo* asáɲoní khumoro quhurínanimboro kimo tiní Anutu koya newonde kanata tewero ɲuro mande meté mu nanɟe.

kondé iñoro Timoti asáñowe yeno uyaró. Ñuro tero no yeño iñondutuye date yote ñu iñowano. Monimbuko towo yiriní kho tatowó ñu kinange piyo taró, peka.

Timotiko Tesalonaika unipare ñuro piña mandeye meté mu Pol miraró

⁶Timoti ye yorotoro itaka ka noreno mahete ña. Enendo piña mande meté yero ñande nore nimitoyote, ko yendo iñondutu kondé tero uni meyowomboro hamó horé iñoyotenggo. Ko naru rokóño noreño meté iño nunoro niyowero ñuro iñoyotenggo. Ñunde ñange norendo ñuya ye yiyowero iñoyoteto. ⁷Ñu murí ñuro, uni topo, quhurí piyimi korowoyoteto quño ñuno newondenanimbo wimbu reyote. Dokoro ñande iñoyoteto, yeño iñondutuye kondé teyote. ⁸Iyo, yendo Uni Parámi quroyómo yotoro kondé kañeyotenggo. Ñunde ti itaka noreño yoto-yotonani muko meté horé tunoqete. ⁹Dokoro yeño oteteye meté ñuro iñoyato Anutuko niñgu-ñingu parámi nunoní parámi yuñgunañoyoteto. ¹⁰Kosa suwo rokóño uyaró ye yiyato yero hariri kondé teyoteto. Uyaróqo samaka yereto Kristoⁿ koro o ñu soso iñomukowañgo.

¹¹Meté Anutu Awananimbo, ko Yesu, Uni Paráminani ñundo, khe ka re nunoriqo, yeno uyarewato. ¹²Uni Parámimbo yeño uni topoyemboya uni soso koya newonde meté yunowero oteteye ñu riníka norendo ye newonde yunoyoteto ñunde qembe parámi tunoqiní. ¹³Enendo newondeye rukisoyoní Yesu, Uni Paráminanimboya unipare meté horéñomboya^o mahewañgo quño ye Anutu Awanani toñímo unipare meté horé tero, potóye moré kini yuri.

Khe u-unani howatoqo, Anutuko ñuro metéñoweya

4 ¹Ñunde ñuroko, uni topo, mande ka yote. Komo ñande yimiratowó, Anutuko otete ñuro metéñoyote ñu ñange howi qembe. Itaka ye ñunde ñange teyotenggo, quko Uni Parámi Yesu quroyómo ñande rukiso yereyoteto, watí-watí hamó howeyuri qembe. ²Dokoro mande soso Uni Parámi Yesu owímo re yunatowó ñu ye iñomukotenggo. ³Qeni, Anutu koro iño-iño ñuko ñandiro. Ye unipare meté horé tero se simbururu ma tewero. ⁴Kini, ye soso Anutu iñoro otete meté howero koweye sañaní sopoyi qembe. ⁵Kape unindo^p Anutu kama iñondutuwo se simbururu kondé teyotenggo. Ye koweye sañaní sopro otete ñu ma howewero. ⁶Ye uni topo-topoye kaná yerero otete piyimi mu pareyemboya ma tewero. Komo norendo ye kondé ñande yimiratowó. Uni Parámimbo uni otete

ⁿ 3:10 “Kristo ” ñuko Yesu ñange, asa Anutuko rokóñoní mahero wiri yerete uni parámi horé tunoqaró ñu. ^o 3:13 “unipare meté horé ” ñuko oteteye soso muko meté ñange kini.

Kini, owé ñu “unipare meté horé” ñuro murí muko ñandiro, “Anutu koro unipare” ñange.

^p 4:5 “kape uni ” ñuko Israel koro Anutuye ñu kama iño howeyotenggo.

ņunde qu teyotēņgo ņu mande khono yorotoweya. ⁷Anutuko ye otete pusú ņu tewero quro kama neko yereró. Kini horé. Otete meté horé qu tewero quro neko yereró. ⁸Ņunde ņuro uni mande ņa wendaqeyote ņuko unindoro mande qu kama wendaqeyote. Kini, ene Anutu koro mande qu wendaqeyote, ņu Anutu ņuko ye Yuqa Surumí yunoyote.

⁹Asa itaka norendo mande ņande qu kama nakayáņowato, ko ye uni topo-topoye newonde meté yunoyi qembe. Dokoro, Anutuko otete meté ņuro iņo-iņo yunaró ņu. ¹⁰Hamó, ye Masedonia mira soso ņuno Anutu koro unipare ņuro newonde meté yunoyotēņgo. Asa uni topo, ņande rukiso yereteto, otete ņu hamó watí-watí teyuri qembe. ¹¹Ko mondó ta kunditewero khe qu kondé seqaya yeņo oteteye nange sopoyi qembe. Yeņo o qoyembo kho ti qembe, komo norendo yimiratowó ņuno qu. ¹²Ņunde ņuro ye o karo kama tukuni tewāņgo, ko kape uni ņundo yeņo oteteye ņuro metéņowāņgo.

Uni Parámi maheweya

¹³Uni topo, uni topo komo khumaņgurí quro do ka tunoqeweya ņuro yatoka iņoyi. Asa unipareto o meté ņuro kama sopoyotēņgo qundo newonde surumí teyotēņgo. Quko ye ņu ma tewero. ¹⁴Dokoro norendo, Yesu khumoro pitu ko otoqaró, yero iņowato tiniqo, ņuya ņande iņowato, Anutuko unipare Yesu iņondutuwoyotēņgo qu komo khumaņgurí ņu pitu ko eneya yoriní mahewāņgo. ¹⁵Dokoro norendo Uni Parámimbo mande yaró ņu howero ņande ye yimitoyoteto, ko Uni Parámi pitu maheweya quno ņuno nore toņe keta yoroteto qundo koretero kama uyarewato. Kini, uni khumaņgurí ņundo koretero uyariqota norepa nange tukú uyarewato. ¹⁶Dokoro koretero sambo simó^q kondé nekero mande kondé yiní Anutu koro uņgu yiní Uni Parámimbo sambo rotoro umbuweya. Ņunde tini unipare Kristo iņondutuwoyate khumaņgurí ņundo koretero otoqowāņgo. ¹⁷Ko nore toņe keta ņano yoroteto qu, unipare khumaņgurí ņuya koporé saņawore oro samboko Uni Parámimboya kopowato. Ņundiro nange Uni Parámimboya suki-suki yorowato. ¹⁸Ņunde ņuro ye mande ņa yero Anutu koro unipare qu rukiso yereyuri qembe.

Uni Parámi maheweya quro roņgaruwi qembe

5 ¹Asa, uni topo, do naru o ņu tunoqeweya ņuro kama nakayáņowano. ²Dokoro ye ņande iņomukotēņgo, Uni Parámi pitu maheweya naru ņuko mondó ta maheweya, momo unindo maheyote ņunde qembe. ³Kumimbo ņande yewāņgo, nore meté yoteto, saņgirí moré kini, yewāņgo. Quko watí yewāņgo quno waka ta horé rambaruru mahiní

^q **4:16** “*sambo simó*” ņuko komo suki-suki Anutuko unipare kama yoriní tunoqi sambo simó yondowaró. Ko itaka eneņo sunará teyotēņgo.

piyo tewango. Rambaruru ŋuko pareto simó pisiyoro kowe surumí teteŋgo ŋunde qembe, ko takawero mepémo kini.

⁴Quko uni topo, yeko huririko kama yotengo. Asa ko yeŋo naru ŋuko momo uni ŋunde qembe kama maheweya. ⁵Dokoro yeko hiyómboro simó ko kosa naru koro simó. Noreko suwo koro simó kini ko huriri koro simó kini. ⁶Ŋunde ŋuroko ma etewero. Uni meyowo ŋundo ŋunde teyotengo. Kini, meté nore kape-kape kama tewero, sopo toŋete yowato. ⁷Dokoro suwono nanŋe unindo eteyotengo, ko suwono nanŋe sono nero kape teyotengo. ⁸Quko noreko hiyómboro simó. Ŋunde ŋuro kape kama tewato. Ŋunde tero iŋondutu tewero otete ŋu rero newonde meté yunowero otete ŋu rero irisa-irisa kawaware nerewero sosoko qu ŋunde qembe punuwato. Ko Anutuko nore rambaruru koŋgo noreweya ŋuro iŋoro sopowero otete ŋu rero takapu kondé ŋunde qembe punuwato. ⁹Dokoro Anutuko piyo tewero quro nore kama rokó yereró. Kini, noreko Uni Paráminani Yesu Kristo^r koro unipare. Ŋunde ŋuroko Anutuko rambaruru koŋgo noreweya. ¹⁰Kristoko nore samaka yerewero khumaró. Ŋunde tiní norendo toŋe keta yorowatope ma khumatowó, imemoŋgo eneya yoto-yoto rewato. ¹¹Ŋunde ŋuroko uni topo-topoye rukiso yereya newondeye wimbu inoyuri qembe. No iŋoteno, ye itaka ŋunde nanŋe teyotengo.

Oresaka mande kumi

¹²Uni topo, o karo kira yereyoteto. Anutu koro kho uni ye keweroyemo koweyumu teyotengo ŋu ará te yunoyi qembe. Uni Parámimbo owéye yunoní ye roŋgaru yereyotengo. ¹³Eneŋo owéye hokoya newonde meté yunoyuri qembe. Dokoro enendo Anutu koro kho qu teyotengo. Ye soso topo-topoyemboya newonde saŋgirí ma tewero, newonde imemo nanŋe yuri qembe. ¹⁴Uni topo, mande kondé ŋande yimiroto, wimbuma uni ŋu roŋgaru yiri qembe, uni sasaro teyotengo ŋu rukiso yiri qembe, uni wimbuye moré kini ŋu samaka yiri qembe, uni soso quya mondó ta yuri qembe. ¹⁵Qeni, o piyimi te yunoyotengo ŋuro topé ma tewero. Kini, naru rokóŋo uni topo-topoyemboya uni soso koya o meté te yunoyuri qembe.

¹⁶Naru rokóŋo niŋgu-niŋgu ti qembe. ¹⁷Hariri tewero otete qu ŋu ma rotowero. ¹⁸O soso ŋuro Anutu yuŋgunanŋi qembe, dokoro Anutu koro iŋo-iŋo ŋuko ŋandiro, yendo Kristo Yesu^s oteteyó howewango.

^r 5:9 “Yesu Kristo” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” nanŋe ye nekaŋgurí. ^s 5:18 “Kristo Yesu” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” nanŋe ye nekaŋgurí.

¹⁹Anutu koro Yuqa Surumí quroyemo yote ŋu ma winzumowero. ²⁰Ye-ye uni^t ma yesaráŋowero. ²¹O soso towoŋoro o meté qu nanŋe towoyi qembe. ²²Murí piyimi kate-kate ŋuro sorero kapiyamo yuri qembe.

²³Asa Anutu newonde ime yunoyote ŋu eneŋombo yoriní uni meté horé hamó tunoqi. Anutuko yuqaye, newondeye, koweye kondé soponí Uni Parámi Yesu Kristo pitu ko ŋano maheweya quño ŋuno potóye moré kini ti. ²⁴Ye neko yereró qundo mande yaró ŋu nanŋe howeyote. Ŋunde ŋuroko ŋundiro nanŋe teweya.

²⁵Uni topo, neneŋo hariri ti qembe. ²⁶Topo-topoye yiyoro epe yuŋguna-yuŋguna ti qembe. ²⁷Uni Parámi owímo ŋande yimiroteno, uni topo soso kopo yereya sokome ŋa weyoyi qembe.

²⁸Uni Paráminani Yesu Kristo koro samaka-samaka tuwóŋo^u ŋu yeya yoní.

^t 5:20 “*ye-ye uni*” ŋuko Anutuko mandí yunoní unipare yunaŋgurí. ^u 5:28 “*samaka-samaka tuwó*” ŋuko Anutu eneŋombo nore samaka yereyote. Kimoyó moré kini.